
NAT DE MONS.

2701, 7226.

LA valors es grans e l'onors,
El fach el dich, el bel semblan
Cortes e franc e ben estan
Dels reis e dels autres senhors.
Mas fach ni dich ni semblan plazentier
Tan solamen no dona pretz entier;
Qu'om pot falhir tant e far mals e tortz
Que perdra'l pretz que l dona bos esfortz.

Dels reis fora grans lor lauzors,
Qui be cossira'l be que fan;
Mas de falhir se plevon tan
Que'l blasme tol al laus son cors.
E'l rei son plus de falhir presentier,
Quar greu auz'om vedar so que rei quier;
Per que de reis cui falhir es deportz
Esta son pretz en perilhozas sortz.

Si falhirs fos tan gran temors
Com es dans à cels que forfan ,
Ja no falhira tan ni quan
Negus , per fort que l fos sabors.
Falhir apel so don blasme se mïer ,
Qu'autre falhir no m fai nul cossirier ;
Mas quan cossir dels dans quals es plus fortz ,
Mais notz blasme que res , neis que la mortz.

Morir es mals si'l falh valors ,
E val tan quan destriga'l dan.
Doncs qui falh ni forsa tot l'an
Mas que no val mortz l'es socors ;
Doncs per blasme vedar a mortz mestier.
Mas part blasme no vei nuls pejurier ,
Ni leu no m ven paor ni desconortz
De si meteis , qui del blasm'es estortz.

Blasmes es grans e desonors
A rei que leu man ni desman ,
Quar sembla de leugier talan
E leu par bes so qu'es folors
Reis deu aver dur cor e dreiturier ,
Que non aia voler ni cug leugier ,
Ni camie leu sos sens ni sos acortz ;
Quar qui leu vol leu falh e leu s'estortz.

Rei d'Aragon , senher on pretz se mïer ,
Vos voles be so que hom vos profier :
Doncs ja de dieu , que tant es grans e fortz ,
Servir no s vir vostre valens esfortz.